



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI

Nr. 867/4 Prot.

Tiranë, më 22 . 08 . 2022

V E N D I M

Nr. 169, Datë 22 . 08 . 2022

Bazuar në nenin 32/1/a dhe nenin 33 të ligjit 10221/2010 *“Për Mbrojtjen nga Diskriminimi”*, të ndryshuar, pranë Komisionerit për Mbrojtjen nga Diskriminimi është paraqitur ankesa nr. 94, datë 06.06.2022, e R.A kundër Njesisë Administrative nr. 4 të Bashkisë Tiranë, në të cilën pretendohet për diskriminim për shkak të *“gjendjes ekonomike”* dhe *“çdo shkak tjetër”¹*.

Në përfundim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I:

I. Parashtrimi i fakteve sipas subjektit ankues.

Sipas shpjegimeve të dhëna, subjekti ankues në mes të tjerash informon se: *“Trajtohet me ndihmë ekonomike prej 1900 lekë. Prej shumë vitesh nuk ka marrë shpërblim të vitit të ri, të pandemisë dhe mbështetjes financiare për rritjen e çmimeve”*.

Në përfundim, subjekti ankues kërkon nga Komisioneri për Mbrojtjen nga Diskriminimi, konstatimin e diskriminimit.

II. Ndjekja e procedurës për shqyrtimin e ankesës nga Komisioneri.

Në nenin 1 të ligjit nr. 10221, datë 04.02.2010 *“Për Mbrojtjen nga Diskriminimi”*, të ndryshuar, përcaktohet se: *“Ky ligj rregullon zbatimin dhe respektimin e parimit të barazisë dhe mosdiskriminimit në lidhje me racën, etninë, ngjyrën, gjuhën, shtetësinë, bindjet politike, fetare ose filozofike, gjendjen ekonomike, arsimore ose shoqërore, gjininë, identitetin gjinor, orientimin seksual, karakteristikat e seksit, jetesën me HIV/AIDS, shtatzëninë, përkatësinë prindërore,*

¹ Pa përcaktuar një cilësi personale apo shkak.

përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore, predispozicionet gjenetike, pamjen e jashtme, aftësinë e kufizuar, përkatësinë në një grup të veçantë, ose me çdo shkak tjetër”.

Neni 5, i ligjit 10221/2010 *“Për Mbrojtjen nga Diskriminimi”*, të ndryshuar, parashikon ndalimin e diskriminimit për shkaqet e përmendura në nenin 1 të këtij ligji. Sipas këtij neni ndalohet gjithashtu mosmarrja në shqyrtim, sipas rasteve të përmendura në nenin 3 të këtij ligji, të një ankimi ose procedure, si dhe çdo formë tjetër sjelljeje, që pengon zbatimin e parimit të trajtimit të barabartë.

Në bazë të nenit 7, të ligjit 10221/2010 *“Për Mbrojtjen nga Diskriminimi”*, të ndryshuar, mbrojtja nga diskriminimi garantohet ndaj çdo veprimi ose mosveprim të autoriteteve publike ose të personave fizikë a juridikë që marrin pjesë në jetën dhe sektorët publikë ose privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë, kur ata ndodhen në rrethana të njëjta ose të ngjashme, në krahasim me persona të tjerë ose grupe të tjera personash.

Në Kreun III, të ligjit të sipërcituar parashikohet mbrojtje e posaçme nga diskriminimi në fushën e të mirave dhe shërbimeve. Ky ligj në nenin 20, pika 1, të tij parashikon se: *“1. Personi fizik ose juridik që ofron të mira apo shërbime për publikun, me pagesë ose jo, ndalohet të diskriminojë një person tjetër, i cili kërkon t’i arrijë ose t’i përdorë ato: a) duke refuzuar t’i japë një personi apo grupi personash të mira apo shërbime për shkaqet e përmendura në nenin 1 të këtij ligji; b) duke refuzuar t’i ofrojë një personi të mira apo shërbime në mënyrë të ngjashme, ose me cilësi të ngjashme, ose në kushte të ngjashme me ato në të cilat këto të mira apo shërbime i ofrohen publikut në përgjithësi”.*

Bazuar në nenin 32/1/a të ligjit 10221/2010 *“Për Mbrojtjen nga Diskriminimi”*, të ndryshuar, Komisioneri ka kompetencë për të shqyrtuar shkeljet që i bëhen zbatimit dhe respektimit të parimit të barazisë në lidhje me këto shkaqe.

Gjatë shqyrtimit të kësaj ankese, Komisioneri ka marrë në shqyrtim vetëm ato çështje, që bëjnë pjesë në kompetencat e tij, të parashikuara nga ligji 10221/2010 *“Për Mbrojtjen nga Diskriminimi”*, të ndryshuar.

Në zbatim të parashikimeve ligjore, të përcaktuara në nenet 32/2 dhe 33 të ligjit 10221/2010 *“Për Mbrojtjen nga Diskriminimi”*, të ndryshuar, Komisioneri për Mbrojtjen nga Diskriminimi, ka shqyrtuar çështjen duke ndërmarrë hapat si më poshtë:

Pas analizimit paraprak të ankesës nr. 94, datë 06.06.2022, të paraqitur nga R.A, u konstatua se nga pikëpamja formale, ajo i plotësonte kërkesat e parashikuara nga neni 33/3 të ligjit 10221/2010 *“Për Mbrojtjen nga Diskriminimi”*, të ndryshuar. Në këto kushte Komisioneri, filloi procedurat përkatëse për shqyrtimin e saj.

- Me shkresën nr. 867/1, datë 13.06.2022, Komisioneri për Mbrojtjen nga Diskriminimi, ka njoftuar dhe ka kërkuar informacion nga Njësia Administrative nr. 4 e Bashkisë Tiranë, për ankesën e bërë nga R.A si dhe ka kërkuar aktet e poshtë cituara:
 - Kopje të plotë të dosjes së trajtimit me ndihmë ekonomike të ankueses.
 - Informacion nëse ka dhe persona të tjerë, të cilët janë në kushte të njëjta apo të ngjashme me ankuesen, dhe si janë trajtuar ato.

Me shkresën nr. 1827/1, datë 17.06.2022, Njësia Administrative nr. 4, Tiranë, informoi Komisionerin se: *“Në mbështetje të ligjit 57/2019 “Për Asistencën Sociale në Republikën e Shqipërisë”, neni 5, theksohen parimet e përgjithshme, ku ndër to përmendim, pika c) “mbështetja sociale është parimi që përcakton se individët/familjet, të cilët përmbushin kushtet për të përfituar, kanë të drejtën e përfitimit në mënyrën e përcaktuar me ligj dhe për aq kohë sa janë në kushtet e vështirësisë e të pamundësisë”.*

Gjithashtu, pika e) përcakton se: “barazia është parimi që përcakton se mbrojtja sociale ofrohet për çdo individ në nevojë, pavarësisht nga gjinia, feja, mosha, aftësitë e kufizuara, etj”.

Referuar sistemit elektronik të ndihmës ekonomike, R.A është përfshirë në skemën e ndihmës ekonomike dhe është trajtuar për periudhën Mars 2016 - Janar 2018, kjo referuar sistemit të pikëzimit.

Sipas pikës 9, Kreu II, të VKM-së nr. 597, datë 04.09.2019 “Për përcaktimin e procedurave, të dokumentacionit dhe të masës mujore të përfitimit të ndihmës ekonomike dhe përdorimit të fondit shtesë mbi fondin e kushtëzuar për ndihmën ekonomike”, mbas verifikimit të të dhënave të deklaruara Drejtoria Rajonale e Shërbimit Social Shtetëror realizon procesin e vendimmarrjes. Sistemi i pikëzimit ka refuzuar për muajin Janar 2018 aplikimin aktiv me arsyen “Nuk ka marrë pikët e mjaftueshme”.

Duke nisur nga kjo, familja është rekomanduar nga administratori shoqëror për të përfituar nga përdorimi i fondit shtesë mbi fondin e kushtëzuar për ndihmën ekonomike, me kusht të plotësimi të kriterëve të miratuara nga Këshilli Bashkiak dhe mbështetur në vlerësimin e situatës social-ekonomike. Familja trajtohet nga fondi vendor nga muaji shkurt 2018- e në vazhdim, në masën prej 1.980 lekë. Gjatë kësaj periudhe R.A ka riaplikuar në sistemin elektronik të ndihmës ekonomike, por aplikimi është refuzuar me arsyen “Nuk ka marrë pikët e mjaftueshme”.

Në lidhje me shpërblimet si ato të fundvitit, pandemisë dhe së fundmi të mbështetjes financiare, përfitimi i kësaj kategorie duhej të rregullohej me një vendim të pushtetit qendror, duke qenë se janë fonde të akorduara prej tij. Si rrjedhojë, përfitues të këtyre shpërblimeve janë familjet e përfshira në sistemin e pikëzimit, trajtuara me fondet e buxhetit të ministrisë”.

III. Vlerësimi i fakteve dhe provave të grumbulluara nga Komisioneri gjatë procesit të shqyrtimit të çështjes.

Mbështetur në provat e administruara gjatë procesit të shqyrtimit të ankesës, Komisioneri vlerëson se:

I. Lidhur me trajtimin e padrejtë, disfavorizues dhe të pabarabartë të ankueses.

Ligji nr. 57, datë 18.07.2019, “Për asistencën sociale në Republikën e Shqipërisë” zbatohet për individët, familjet në nevojë, personat me aftësi të kufizuara në Republikën e Shqipërisë dhe nënat me foshnja të porsalindura, për ofrimin dhe garantimin e asistencës sociale.

Neni 7 i këtij ligji parashikon shprehimisht se:

“Përfituesit e ndihmës ekonomike janë:

- a) familjet në nevojë, që nuk kanë të ardhura ose kanë të ardhura të pamjaftueshme;*
- b) jetimët, të cilët nuk janë në institucionet e përkujdesjes shoqërore;*
- c) prindërit me më shumë se 2 fëmijë të lindur njëherësh, që u përkasin familjeve në nevojë;*
- d) viktimat e trafikimit, pas daljes nga institucionet e përkujdesjes shoqërore, deri në çastin e punësimit të tyre;*
- e) viktimat e dhunës në marrëdhëniet familjare, për periudhën e vlefshmërisë së urdhrin të mbrojtjes ose urdhrin të menjëhershëm të mbrojtjes, që nuk trajtohen në institucionet e përkujdesjes shoqërore”.*

Neni 12, pikat 1-2, të ligjit të sipërcituar parashikojnë gjithashtu se ndihma ekonomike është një pagesë që jepet në formën e një shpërblimi mujor në lekë, për kategoritë e përcaktuara në nenin 7, të këtij ligji. Ndihma ekonomike, që përfitojnë familjet dhe individët në nevojë, është e plotë dhe masa nuk kufizohet për shkak të numrit të anëtarëve. Ndihmë ekonomike përfitojnë familjet që nuk kanë të ardhura ose kanë të ardhura të pamjaftueshme nga programet e mbrojtjes shoqërore, remitancat, qiraja, asetet, bujqësia apo të ardhura të tjera, dhe individët e përcaktuar në nenin 7, të këtij ligji.

Kategoritë e individëve që mund të aplikojnë për të përfituar ndihmë ekonomike, si dhe mënyrën se si bëhet pranueshmëria në skemën e ndihmës ekonomike, përcaktohet shprehimisht në nenin 16, pikat 1-3, të ligjit të sipërcituar, ku parashikohet se:

1. Kërkesa për të përfituar ndihmë ekonomike bëhet nga:

- a) kryetari i familjes ose njëri nga anëtarët madhorë të familjes, së bashku me bashkëshortin/en ose i vetëm, kur nuk ka bashkëshort/e;*
- b) secili prej bashkëshortëve, në rastet kur ata janë në proces zgjidhjeje martese dhe nuk ka ende vendim gjykatë të formës së prerë;*
- c) nga vetë individi, sipas përcaktimeve në shkronjat “b”, “ç” e “d”, të nenit 7.*

2. Aplikimi për të përfituar ndihmë ekonomike bëhet tek administratori shoqëror në njësinë administrative, nën juridiksionin e së cilës ka vendbanimin. Kriteret, procedura dhe dokumentacioni për përfitimin e ndihmës ekonomike, si dhe masa e përfitimit të saj përcaktohen me vendim të Këshillit të Ministrave.

3. Pranueshmëria në skemën e ndihmës ekonomike bëhet nëpërmjet formulës së pikëzuar, treguesit e së cilës mbajnë parasysh gjendjen e varfërisë. Treguesit e vlerësimit të formulës së unifikuar të pikëzimit për përfitimin e ndihmës ekonomike përcaktohen me vendim të Këshillit të Ministrave.”

Në Vendimin nr. 956, datë 7.12.2016, e Këshillit të Ministrave, “Për përcaktimin e kriterëve dhe të detajeve të formulës së unifikuar të pikëzimit për përfitimin e ndihmës ekonomike” parashikohet se formula e unifikuar e pikëzimit përfshin parametra të lidhur në mënyrë empirike me vlerësimin e situatës ekonomike të familjeve, të tilla si: të ardhurat nga programi i mbrojtjes sociale, remitancat, qiraja, asetet, bujqësia, blegtoria, trashëgimia dhe dhuratat. Treguesit e vlerësimit, pjesë e formulës së unifikuar të pikëzimit, që ndihmojnë në përcaktimin e kriterëve të pranueshmërisë së familjeve për përfitimin e ndihmës ekonomike, përcaktohen sipas shtojcës 1, bashkëlidhur këtij vendimi. Në këtë kontekst, është pikërisht sistemi zbatues i kësaj formule, që për zgjedh familjet përfituese të ndihmës ekonomike.

Në zbatim të ligjit 57, datë 18.07.2019, “Për asistencën sociale në Republikën e Shqipërisë” është miratuar Vendimi nr. 597, datë 04.09.2019, i Këshillit të Ministrave, “Për përcaktimin e procedurave të dokumentacionit dhe të masës mujore të përfitimit të ndihmës ekonomike dhe përdorimit të fondit shtesë mbi fondin e kushtëzuar për ndihmën ekonomike”. Kreu I, pika 2, germa a), e VKM-së sipërcituar, përcakton se: “Përfituesit e ndihmës ekonomike janë: a) familjet në nevojë, që nuk kanë të ardhura ose me të ardhura të pamjaftueshme;”.

Ndër të tjera, në këtë VKM, në Kreun II përcaktohet edhe procedura e aplikimit për ndihmë ekonomike. Gjatë kësaj procedure, theksohet roli tepër i rëndësishëm i administratorit shoqëror. Administratori shoqëror identifikon familjet dhe individët në nevojë, i informon ata mbi procedurat e aplikimit dhe të përfitimit të ndihmës ekonomike dhe i fton ata për aplikim. Administratori shoqëror, në prani të kryetarit të familjes/anëtarit madhor, së bashku me bashkëshortin/en, ose të vetëm kur nuk ka bashkëshort/e, kur aplikon për ndihmë ekonomike, hedh në Regjistrin Elektronik Kombëtar, brenda 10 (dhjetë) ditëve të para të muajit, të dhënat e mëposhtme:

- a) Formularin për aplikim për ndihmë ekonomike, sipas shtojcës 1, që i bashkëlidhet këtij vendimi, si pjesë përbërëse e tij, dhe që përmbledh informacionin për:
 - i) demografinë e familjes, arsimin dhe punësimin;
 - ii) llojin e banesës;
 - iii) pasuritë/asetet familjare;
 - iv) të ardhurat nga programet e mbrojtjes shoqërore dhe të ardhurat e tjera.

Njëkohësisht, administratori shoqëror, pasi verifikon situatën social ekonomike të familjeve në nevojë nëpërmjet vizitave në familje dhe në terren, brenda muajit të aplikimit për familjet që aplikojnë për herë të parë si dhe dy herë në vit për të gjitha familjet që trajtohen me ndihmë ekonomike, hedh në Regjistrin Elektronik Kombëtar të dhënat sipas formularit në shtojcën 2, që i bashkëlidhet këtij vendimi dhe është pjesë përbërëse e tij. Administratori shoqëror paraqet pranë

strukturës përgjegjëse për shërbimet sociale në bashki, nëpërmjet Regjistrit Elektronik Kombëtar, listën e familjeve/individëve në nevojë që kanë aplikuar për ndihmë ekonomike;

Në pikën 8, të Kreut II, të VKM-së së sipërcituar parashikohen edhe funksionet dhe përgjegjësitë e Drejtorisë Rajonale të Shërbimit Social Shtetëror, për realizimin e procesit të vendimmarrjes për përfituesit e ndihmës ekonomike. Kështu, kjo strukturë ka përgjegjësitë e mëposhtëme: a) verifikon të dhënat e regjistruara nga administratori shoqëror për familjet/individët në nevojë në Regjistrin Elektronik Kombëtar, si dhe konfirmon saktësinë e tyre pranë autoriteteve shtetërore përgjegjëse dhe në bazë të aplikimit të formulës së pikëzuar për familjet në nevojë; b) merr vendime për caktimin e familjeve/individëve në nevojë, përfitues të ndihmës ekonomike, masën e përfitimit të tyre si edhe refuzon kërkesën për dhënien e përfitimit të ndihmës ekonomike të shoqëruar me arsyet e refuzimit, sipas formatit në shtojcën 5, që i bashkëlidhet këtij vendimi; c) ia dërgon vendimin kryetarit të bashkisë për të njoftuar kërkuar për përfitimin e ndihmës ekonomike ose për të kryer veprimet financiare për pagesën për përfituesit e ndihmës ekonomike. Procesi i vendimmarrjes kryhet nga Drejtoria Rajonale e Shërbimit Social Shtetëror brenda muajit të aplikimit të qytetarëve për ndihmë ekonomike. Referuar germës b), të pikës 8, të kësaj VKM-je, duhet vënë në dukje fakti se Drejtoria Rajonale e Shërbimit Social Shtetëror merr vendime në bazë të rezultateve të dala nga sistemi elektronik i pikëzimit, si dhe përcakton masën e përfitimit apo refuzimit të kërkesës së familjeve aplikuese në bazë të parashikimeve ligjore.

Për sa më sipër, ankuesja R.A ka aplikuar disa herë për të qenë përfituese e ndihmës ekonomike dhe në të gjitha aplikimet e saj, sistemi elektronik nuk e ka përzgjedhur si përfituese të kësaj ndihme, pasi nuk ka marrë pikët e mjaftueshme për të përfituar ndihmë ekonomike nga SHSSH.

Nga analizimi i akteve ligjore dhe nënligjore të sipërcituara refuzimi i ankueses për të qenë përfituese e ndihmës ekonomike është kryer nga sistemi përkatës i pikëzimit, i cili e bën përzgjedhjen në mënyrë automatike të familjeve që përfitojnë ndihmë ekonomike. Kriteret dhe vlerësimin përkatës e bën sistemi dhe në asnjë rast subjekti kundër të cilit drejtohet ankesa. Në këtë kontekst, rezulton se Njësia Administrative nr. 4, Tiranë nuk ka ndikuar në refuzimin e ankueses si përfituese nga ana e sistemit të pikëzimit.

Pavarësisht sa më sipër, ligjvënësi ka përcaktuar mënyra alternative për të ndihmuar ato familje që nuk rezultojnë përfituese të ndihmës ekonomike nga sistemi i pikëzimit, duke i trajtuar me fondin shtesë mbi fondin e kushtëzuar për ndihmën ekonomike. Kështu në Pjesën IV, të Vendimit nr. 597/2019, të Këshillit të Ministrave, Këshilli Bashkiak miraton në fillim të vitit kriteret për dhënien e ndihmës ekonomike për familjet aplikuese për ndihmë ekonomike, të cilat nuk janë shpallur përfituese nga sistemi i pikëzimit dhe që do të trajtohen me fondin shtesë mbi fondin e kushtëzuar për ndihmën ekonomike.

Këshilli Bashkiak ka të drejtë të miratojë dhënien e ndihmës ekonomike për familjet aplikuese, të cilat nuk janë shpallur përfituese nga sistemi i pikëzimit, duke përdorur fondin shtesë mbi fondin e kushtëzuar për ndihmën ekonomike. Fondi shtesë mbi fondin e kushtëzuar për ndihmën ekonomike është 6% e këtij fondi dhe mbi këtë fond mund të shtohen ose jo edhe fonde të buxhetit vendor. Akordimi i fondit deri në 6% i shtohet çeljes faktike të çdo 2-mujori që

transferohet për përfituesit e ndihmës ekonomike të përzgjedhur nga sistemi i pikëzimit. Familjet në nevojë, në momentin që përzgjidhen nga lista e familjeve, duhet të kenë aplikuar brenda tre muajve të fundit nëpërmjet Regjistrat Elektronik Kombëtar për ndihmë ekonomike dhe që nuk janë shpallur përfituese nga sistemi i pikëzimit.

Në kushtet kur, ankuesja është refuzuar nga sistemi elektronik i pikëzimit për të qenë përfituese e ndihmës ekonomike, si dhe duke qenë në dijeni të gjendjes së saj ekonomike, administratori shoqëror i njësisë administrative e ka referuar për të përfituar nga skema e ndihmës financiare 6%. Këshilli Bashkiak ka miratuar kërkesën duke i akorduar ankueses ndihmën prej 1980 lekë nga muaji shkurt 2018 e në vijim.

- Lidhur me pretendimin e ankueses për mospërfitimin e shpërblimit të fundvitit, të pasojave të Covid-19 dhe të zbutjes së efekteve të ndikuara nga lufta në Ukrainë.

Këshilli i Ministrave me Vendimin nr. 791, datë 15.12.2021 “Për shpërblimin e disa kategorive të veçanta për festat e fundvitit 2021”, ka vendosur shpërblimin e disa kategorive për festat e fundvitit, si më poshtë:

1. Përfituesit nga skema e ndihmës ekonomike dhe aftësisë së kufizuar shpërblehen financiarisht, për vitin 2021, në masën 3 000 (tre mijë) lekë, të ndarë sipas kategorive të mëposhtme:
 - a) familjet dhe individët përfitues të ndihmës ekonomike, të përcaktuar në nenin 7, të ligjit nr. 57/2019, “Për asistencën sociale në Republikën e Shqipërisë”;
 - b) individët përfitues të pagesës së aftësisë së kufizuar, të përcaktuar në shkronjat “b” dhe “c”, të nenit 8, të ligjit nr. 57/2019, “Për asistencën sociale në Republikën e Shqipërisë”;
 - c) individët përfitues të statusit, sipas ligjit nr. 8626, datë 22.6.2000, “Statusi i invalidit paraplegjik dhe tetraplegjik”, të ndryshuar; ç) individët përfitues të statusit, sipas ligjit nr. 8098, datë 28.3.1996, “Për statusin e të verbrit”, të ndryshuar.

Këshilli i Ministrave me Vendimin nr. 13, datë 22.04.2020 “Për disa shtesa dhe ndryshime në Vendimin nr. 305, datë 16.04.2020, e Këshillit të Ministrave, “Për përcaktimin e procedurave, të dokumentacionit dhe të masës së përfitimit të ndihmës financiare për të punësuarit aktualë dhe punonjësit e larguar nga puna si pasojë e Covid-19”, ka vendosur dhënien e ndihmës financiare për disa kategori, si më poshtë:

- Dhënien e ndihmës financiare prej 40 000 (dyzet mijë) lekësh për punonjësit e Rafinerisë së Naftës, Ballsh, të cilët figurojnë në listëpagesën e muajit dhjetor 2019 dhe që kanë një pagë bruto nën masën 100 000 (njëqind mijë) lekë/muaj.
- Dhënia e ndihmës financiare prej 16 000 (gjashtëmbëdhjetë mijë) lekësh për aplikuesit e ndihmës ekonomike, të cilët rezultojnë aplikues që nga muaji korrik 2019 e deri në muajin prill 2020, të cilët nuk kanë përfituar ndihmë ekonomike dhe, aktualisht, nuk përfitojnë as nga fondi 6 për qind akorduar bashkive, përveç rasteve që janë përjashtuar

nga skema e ndihmës ekonomike, sipas nenit 15 të ligjit nr. 57/2019, “Për asistencën sociale në Republikën e Shqipërisë”.

Këshilli i Ministrave me Vendimin nr. 159, datë 12.03.2022 “Për mbështetjen financiare të disa kategorive të veçanta për zbutjen e efekteve të ndikuara nga lufta në Ukrainë”, ka vendosur mbështetjen financiare, në masën 3 000 (tre mijë) lekë në muaj për një periudhë tremujore, kategorive si më poshtë:

- a) Familjet dhe individët përfitues të ndihmës ekonomike, të përcaktuar në nenin 7, të ligjit nr. 57/2019, “Për asistencën sociale në Republikën e Shqipërisë”;
- b) Individët përfitues të pagesës së aftësisë së kufizuar, të përcaktuar në shkronjat “b” dhe “c”, të nenit 8, të ligjit nr.57/2019, “Për asistencën sociale në Republikën e Shqipërisë”;
- c) Individët përfitues të statusit, sipas ligjit nr. 8626, datë 22.6.2000, “Statusi i invalidit paraplegjik dhe tetraplegjik”, të ndryshuar;
- ç) Individët përfitues të statusit, sipas ligjit nr.8098, datë 28.3.1996, “Për statusin e të verbrit”, të ndryshuar;
- d) Personat, që përfitojnë pension invaliditeti, sipas ligjit nr.7703, datë 11.5.1993, “Për sigurimet shoqërore në Republikën e Shqipërisë”, të ndryshuar;
- dh) Personat, që përfitojnë pension familjar, sipas ligjit nr.7703, datë 11.5.1993, “Për sigurimet shoqërore në Republikën e Shqipërisë”, të ndryshuar;
- e) Personat, që përfitojnë pension pleqërie, sipas ligjit nr.7703, datë 11.5.1993, “Për sigurimet shoqërore në Republikën e Shqipërisë”, të ndryshuar, dhe masa e pensionit mujor të tyre është më e ulët ose e barabartë me 50% të pagës minimale neto në shkallë vendi;
- ë) Kryefamiljarët, që përfitojnë pension pleqërie, sipas ligjit nr.7703, datë 11.5.1993, “Për sigurimet shoqërore në Republikën e Shqipërisë”, të ndryshuar, dhe përfitojnë kompensim për efekt të rritjes së çmimit të energjisë elektrike, sipas vendimeve të Këshillit të Ministrave nr.565, datë 9.8.2006, “Për mbrojtjen e shtresave në nevojë nga rritja e çmimit të energjisë elektrike”, nr.238, datë 7.4.2010, “Për një ndryshim në vendimin nr.565, të Këshillit të Ministrave, “Për mbrojtjen e shtresave në nevojë nga rritja e çmimit të energjisë elektrike””, nr.8, datë 14.1.2015, “Për mbrojtjen e shtresave në nevojë, për efekt të heqjes së fashës së konsumit të energjisë elektrike deri në 300 Kwh në muaj”.

Referuar akteve ligjore të sipërcituara, rezulton se ankuesja si përfituese e fondit shtesë mbi fondin e kushtëzuar për ndihmën ekonomike, nuk përfshihet në asnjë prej kategorive përfituese të përcaktuara në vendimet e Këshillit të Ministrave, për dhënien e shpërblimit të fundvitit, të dhënies së ndihmës financiare të pasojave të Covid-19 dhe të zbutjes së efekteve të ndikuara nga lufta në Ukrainë, si rezultat nuk mund të përfitonte ndihmë financiare nga Njësia Administrative nr. 4, Tiranë.

Për sa më sipër, Komisioneri vlerëson se ankuesja nuk është ekspozuar ndaj një trajtimi të padrejtë dhe disfavorizues nga ana e Njesisë Bashkiake nr. 4, e Bashkisë Tiranë.

Në mungesë të një trajtimi të tillë nuk ekziston diskriminim për shkaqet e pretenduara në ankesë.

PËR KËTO ARSYE:

Mbështetur në, nenin 1, nenin 7, pika 1, nenin 20 dhe 21, pika 1, nenin 32, pika 1, gërma a) e nenin 33, pikat 9-10, të Ligjit nr. 10221, datë 04.02.2010 “*Për Mbrojtjen nga Diskriminimi*”, të ndryshuar,

Komisioneri për Mbrojtjen nga Diskriminimi,

V E N D O S I :

1. Konstatimin e mosdiskriminimit të R.A, për shkak të gjendjes ekonomike, nga ana e Njësisë Bashkiake nr. 4, e Bashkisë Tiranë.
2. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijeni.

KOMISIONERI

Robert GAJDA